

Ўзбекистон Республикасининг Қонуни

Фазовий маълумотлар миллий инфратузилмаси тўғрисида

1-боб. Умумий қоидалар

1-модда. Ушбу Қонуннинг мақсади

Ушбу Қонуннинг мақсади Ўзбекистон Республикасида давлат органлари томонидан самарали бошқарув қарорлари қабул қилиниши, жамиятнинг барча турдаги географик ахборотга бўлган эҳтиёжи қондирилиши, фазовий маълумотларнинг глобал инфратузилмага интеграциясини таъминлашдан, фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги муносабатларни тартибга солишдан иборат.

2-модда. Фазовий маълумотлар миллий инфратузилмаси тўғрисидаги қонун ҳужжатлари

Фазовий маълумотлар миллий инфратузилмаси тўғрисидаги қонун ҳужжатлари ушбу Қонун ва бошқа қонун ҳужжатларидан иборатдир.

Агар Ўзбекистон Республикасининг халқаро шартномасида Ўзбекистон Республикасининг фазовий маълумотлар миллий инфратузилмаси тўғрисидаги қонун ҳужжатларида назарда тутилганидан бошқача қоидалар белгиланган бўлса, халқаро шартнома қоидалари қўлланилади.

3-модда. Асосий тушунчалар

Ушбу Қонунда қуйидаги асосий тушунчалар қўлланилади:

базавий фазовий маълумотлар – геоахборот тизимларига интеграция қилиш ва биргаликда фойдаланиш учун унификациялаштирилган асос сифатида ҳамма учун очиқ стандартлаштирилган фазовий маълумотлар йиғиндиси;

буюртмачи – фазовий маълумотларни яратиш учун буюртма берадиган давлат органи ва юридик ёки жисмоний шахслар;

геоахборот ресурслари – ахборот банклари ва фазовий маълумотлар базалари ҳамда метамаълумотлар, фазовий маълумотлар сервислари йиғиндиси;

геоахборот тизими – фазовий маълумотларни тўплаш, сақлаш, излаш, ишлов бериш, фойдаланиш, таҳлил қилиш, моделлаштириш, визуаллаштириш ва тақдим этишни таъминлайдиган ахборот тизими;

геофазовий объект – ерда муайян жойлашуви ҳамда қабул қилинган фазо-вақт координаталари тизимида белгиланганлиги билан тавсифланадиган объект ёки реал дунё ва ижтимоий-иқтисодий муносабатлар ҳодисаси;

интероперабеллик (ўзаро бир-бирига мос келишлик) – фазовий маълумотлар, метамаълумотлар, фазовий маълумотлар миллий инфратузилмасининг техник ва дастурий воситаларининг функционал ва информатион ўзаро боғланиш қобилияти;

ихтисослашган фазовий маълумотлар – базавий фазовий маълумотлардан фойдаланган ҳолда яратилган мавзули фазовий маълумотлар;

метамаълумотлар – фазовий маълумотлар тўплamlари ва сервисларини таърифлайдиган ҳамда уларни излаш, хатловдан ўтказиш ва фойдаланиш имконини берадиган ахборот;

фазовий (геофазовий) маълумотлар – жойдаги объектларнинг жойлашуви ҳақида муайян шаклда ва координаталар тизимларида тақдим этиладиган маълумотлардан иборат ахборот, геофазовий объект ҳақидаги маълумотлар тўплами;

фазовий (геофазовий) маълумотлар базаси – фойдаланувчининг излаши ва фойдаланиши учун тизимли тартибга солинган ва ишлов берилган фазовий (геофазовий) маълумотлар йиғиндисиди;

фазовий маълумотлар банки – базавий фазовий маълумотлар, уларнинг метамаълумотлари, классификаторлари, ахборотномалари ва реестрлари, шу жумладан, Географик объектлар номларининг давлат реестри ҳамда Кўчмас мулк объектларининг ягона реестри тўплamlарининг йиғиндисиди;

фазовий маълумотлар инфратузилмаси – базавий ва ихтисослашган фазовий маълумотларнинг, метамаълумотларнинг, стандартларнинг ва регламентларнинг, ахборот узатиш тармоқларининг, геосервисларнинг географик ахборот ресурсларидан фойдаланиш ва уларни алмашиш тизими;

Фазовий маълумотлар миллий инфратузилмаси – ташкилий тузилма, илмий-техника сиёсати, техник ва дастурий воситалар, базавий ва соҳага оид фазовий маълумотлар, метамаълумотлар ҳамда метамаълумотлар базаларини, фазовий маълумотлар сервисларини, норматив-ҳуқуқий ҳужжатларни, шунингдек техник жиҳатдан тартибга солиш соҳасидаги норматив ҳужжатларни, халқаро стандартларни ўз ичига оладиган, Ўзбекистон Республикаси ҳудудида фойдаланилиши мумкин бўлган фазовий маълумотларни ишлаб чиқиш, янгилаш, уларга ишлов бериш, уларни сақлаш, бериш, интеграциялаш ҳамда улардан фойдаланиш масалаларига доир Ўзбекистон Республикаси давлат стандартларини ўз ичига оладиган тизим;

фазовий маълумотлар миллий инфратузилмаси администратори (администратор) – Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги чора-тадбирларни амалга оширадиган Ўзбекистон Республикаси Ер ресурслари, геодезия, картография ва давлат кадастри давлат қўмитаси тизимидаги юридик шахс бўлиб, фазовий маълумотлар миллий инфратузилмасининг техник ва технологик таъминоти, сифатини назорат қилиш, ундаги маълумотларнинг сақланиши ва ҳимояси учун жавобгар бўлади;

фазовий маълумотлар ишлаб чиқувчиси – давлат органи ёки фазовий маълумотларни ва метамаълумотларни яратиш ва янгилашни амалга оширадиган ҳар қандай юридик ёки жисмоний шахс;

фазовий маълумотлар миллий инфратузилмасининг геопортали – геоахборот ресурслари ҳақида метамаълумотларни сақлаб турадиган ва Интернет жаҳон ахборот тармоғи орқали улардан фойдаланишни таъминлайдиган фазовий маълумотлар сервислари ва бошқа воситалар йиғиндиси;

фазовий маълумотларнинг интеграциялашуви – турли манбалардан олинган геофазовий объектлар ҳақидаги маълумотларни бирлаштириш;

фазовий маълумотлар сақловчиси – давлат органи, шунингдек фазовий маълумотларни бошқарадиган ҳамда мазкур Қонунда назарда тутилган бошқа функцияларни амалга оширадиган ҳар қандай юридик ёки жисмоний шахс;

фазовий маълумотлар сервислари – дастурий-техник воситалар, улар ёрдамида фойдаланиш учун фазовий маълумотлар берилади ва уларга ишлов бериш бўйича операциялар амалга оширилади;

фазовий маълумотлар тўплами – идентификация қилиш мумкин бўлган фазовий маълумотлар жамланмаси;

фазовий маълумотлар фойдаланувчиси (фойдаланувчи) – фазовий маълумотлардан фойдаланадиган ҳар қандай жисмоний ёки юридик шахс.

4-модда. Фазовий маълумотлар миллий инфратузилмасини яратиш, унинг амал қилиши ва уни ривожлантиришнинг асосий принциплари

Фазовий маълумотлар миллий инфратузилмасини яратиш, унинг амал қилиши ва уни ривожлантиришнинг асосий принциплари қўйидагилардан иборат:

фазовий маълумотларни яратиш ва улардан фойдаланиш, фазовий маълумотлар миллий инфратузилмасини яратиш, қўллаб-қувватлаш ва ривожлантириш соҳасидаги давлат бошқаруви;

фазовий маълумотларни яратиш, фойдаланиш ва сифатини назорат қилиш тартиб-таомилларини стандартлаштириш;

фазовий маълумотларнинг долзарблиги, тўлиқлиги, аниқлиги ва ишончлилиги;

фазовий маълумотлар сервисларининг, фазовий маълумотлар тўпламлари ва уларнинг метамаълумотларини интероперабеллиги (ўзаро мослиги);

базавий фазовий маълумотлар ҳамда метамаълумотларнинг барча манфаатдор фойдаланувчилар учун очиқлиги ва оммавийлиги.

5-модда. Фазовий маълумотларни яратиш ва улардан фойдаланиш, фазовий маълумотлар миллий инфратузилмасини яратиш, қўллаб-қувватлаш ва уни ривожлантириш соҳасидаги давлат бошқаруви

Фазовий маълумотларни яратиш ва улардан фойдаланиш, фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасини давлат томонидан бошқариш ва қўллаб-қувватлаш ягона илмий-техник сиёсат, норматив-ҳуқуқий база, стандартлаштириш ва техник бошқарув, фазовий маълумотларни ишлаб чиқиш, янгилаш, ишлов бериш, сақлаш, тақдим этиш ва фойдаланилишини назорат қилиш орқали амалга оширилади.

6-модда. Фазовий маълумотларни яратиш, фойдаланиш ва сифатини назорат қилиш тартиб-таомилларини стандартлаштириш

Фазовий маълумотларни яратиш, фойдаланиш ва сифатини назорат қилиш тартиб-таомилларини стандартлаштириш қуйидагиларни ташкил қилади:

фазовий маълумотларни барча геофазовий объектлар бўйича шакллантиришнинг ягона методологиясини қўллаш;

фазовий маълумотларни ишлаб чиқиш, янгилаш, ишлов бериш, сақлаш, тақдим этиш ва фойдаланиш жараёнларини стандартлаштириш ҳамда техник бошқариш тизимини жорий этиш;

фазовий маълумотларнинг миллий инфратузилмасини яратиш, унинг амал қилиши ва уни ривожлантириш соҳасидаги фаолиятнинг барча субъектлари томонидан Ўзбекистон Республикаси давлат стандартлари ва техник жиҳатдан тартибга солиш соҳасидаги норматив ҳужжатлари талабларининг бажарилиши;

фазовий маълумотларни яратиш ва фойдаланиш бўйича техник жиҳатдан тартибга солиш соҳасидаги норматив ҳужжатларни тегишли халқаро стандартлар билан уйғунлаштириш орқали амалга оширилади.

7-модда. Фазовий маълумотларнинг долзарблиги, тўлиқлиги, аниқлиги ва ишончлилиги

Фазовий маълумотларнинг долзарблиги, тўлиқлиги, аниқлиги ва ишончлилиги:

давлат геодезик, нивелир ва гравиметрик тармоқларини иш ҳолатида сақлаб туриш;

бутун масштаб катори давлат топографик хариталарини картографик мониторинг қилиш ва узлуксиз янгилаш тизимини жорий этиш;

давлат ахборот ресурслари ва янги базавий фазовий маълумотларни яратишда регламентланган координаталар тизимларидан ва мавжуд базавий фазовий маълумотлардан фойдаланиш;

базавий ва ихтисослашган фазовий маълумотлар ва метамаълумотларнинг доимий мониторингини олиб бориш, илмий-техник экспертизадан ўтказиш ва назорат қилиш орқали таъминланади.

8-модда. Фазовий маълумотлар сервисларининг, фазовий маълумотлар тўплamlари ва уларнинг метамаълумотларини интероперабеллиги (ўзарo мослиги)

Фазовий маълумотлар сервисларининг, фазовий маълумотлар тўплamlари ва уларнинг метамаълумотларини интероперабеллиги (ўзарo мослиги):

базавий ва ихтисослашган фазовий маълумотлар ва метамаълумотларнинг ўзарo бир-бирига мос шаклларида фойдаланиш;

фазовий маълумотларнинг бир-бирига мос ва очиқ сервисларидан фойдаланиш;

фазовий маълумотларнинг миллий инфратузилмасини яратиш, унинг амал қилиши ва уни ривожлантириш соҳасидаги фаолиятнинг барча субъектлари томонидан Ўзбекистон Республикаси давлат стандартлари ва техник жиҳатдан тартибга солиш соҳасидаги норматив ҳужжатлар талаблари орқали таъминланади.

9-модда. Базавий фазовий маълумотлар ҳамда метамаълумотларнинг барча манфаатдор фойдаланувчилар учун очиқлиги ва оммавийлиги

Базавий фазовий маълумотлар ҳамда метамаълумотларнинг барча манфаатдор фойдаланувчилар учун очиқлиги ва оммавийлиги:

базавий фазовий маълумотлар таркибида давлат сирини ташкил қиладиган маълумотларнинг, шунингдек, қонунчиликка мувофиқ фойдаланилиши чекланган бошқа ахборотнинг бўлмаслиги;

фазовий маълумотларни излаш, кўриш, улардан барча манфаатдор фойдаланувчиларнинг фойдаланиши сервислари, шунингдек фазовий маълумотлар координаталарини битта координаталар тизимидан ёки картографик проекциядан бошқасига ўтказишни таъминлайдиган координаталар операциялари сервислари мавжуд геопорталларнинг яратилиши ва тармоқ администратори томонидан уларга хизмат кўрсатилиши орқали таъминланади.

10-модда. Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги фаолият объектлари

Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги фаолият объектлари қуйидагилардан иборат:

- геофазовий объектлар;
- геодезия ва картография материаллари ва маълумотлари;
- фазовий маълумотлар ва метамаълумотлар базалари;
- геоахборот тизимлари;
- геоахборот ресурслари.

11-модда. Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги фаолият субъектлари

Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги фаолият субъектлари қуйидагилардан иборат:

- Ўзбекистон Республикаси Вазирлар Маҳкамаси;
- махсус ваколатли давлат бошқаруви органи – Ўзбекистон Республикаси Ер ресурслари, геодезия, картография ва давлат кадастри давлат қўмитаси (бундан буён матнда махсус ваколатли орган деб юритилади);
- Ўзбекистон Республикаси Мудофаа вазирлиги;
- ўз ваколатига кўра геодезия ва картография фаолиятини тартибга солувчи бошқа давлат органлари ҳамда маҳаллий ижро этувчи ҳокимият органлари;
- администратор;
- юрidik ва жисмоний шахслар – фазовий маълумотларни ишлаб чиқувчилар;
- юрidik ва жисмоний шахслар – фазовий маълумотларни сақловчилар;
- фойдаланувчилар.

Мазкур модданинг биринчи қисмида кўрсатилган фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги фаолият субъектлари фазовий маълумотлар миллий инфратузилмасининг ташкилий тузилмасини ташкил қилади.

12-модда. Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги халқаро ҳамкорликда Ўзбекистон Республикасининг иштирок этиши

Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги халқаро ҳамкорликда Ўзбекистон Республикаси умумэтироф этилган халқаро ҳуқуқ меъёрлари ҳамда миллий қонунчиликка мувофиқ иштирок этади.

2-боб. Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги давлат бошқаруви

13-модда. Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасида давлат сиёсатини амалга оширувчи органлар

Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасида давлат сиёсатини амалга оширувчи органлар қуйидагилардан иборат:

Ўзбекистон Республикаси Вазирлар Маҳкамаси;

махсус ваколатли орган;

Ўзбекистон Республикаси Мудофаа вазирлиги;

маҳаллий ижро этувчи ҳокимият органлари.

Ушбу модданинг биринчи қисмида кўрсатилмаган органлар ҳамда ташкилотлар қонун ҳужжатларига мувофиқ фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги давлат сиёсатини амалга оширишда иштирок этади.

14-модда. Ўзбекистон Республикаси Вазирлар Маҳкамасининг фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги ваколатлари

Ўзбекистон Республикаси Вазирлар Маҳкамаси:

фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги ягона давлат сиёсатини белгилайди;

фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги давлат мақсадли дастурларини тасдиқлайди;

фазовий маълумотлар миллий инфратузилмасини юритиш тартибини белгилайди;

базавий фазовий маълумотлар банки ахборотининг оммавийлиги (очиқлиги) шартларини белгилайди;

фазовий маълумотлар миллий инфратузилмасидаги фазовий маълумотларни яратиш, янгилаш, ишлов бериш, сақлаш ва координаталар тизимида тақдим этиш тартибини белгилайди;

Фазовий маълумотлар миллий инфратузилмаси бўйича мувофиқлаштирувчи кенгашни ташкил қилиш, мазкур кенгаш тўғрисидаги низом ва унинг таркибини тасдиқлайди;

махсус ваколатли органнинг фазовий маълумотлар миллий инфратузилмасини жорий этиш ва ундан фойдаланиш бўйича ишлар ҳолати ҳақидаги йиллик ҳисоботини эшитади.

Ўзбекистон Республикаси Вазирлар Маҳкамаси қонун ҳужжатларига мувофиқ бошқа ваколатларни ҳам амалга ошириши мумкин.

15-модда. Ўзбекистон Республикаси Ер ресурслари, геодезия, картография ва давлат кадастри давлат қўмитасининг фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги ваколатлари

Махсус ваколатли орган:

фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги ягона давлат сиёсатини шакллантириш ва амалга оширишда иштирок этади;

фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги давлат мақсадли дастурлари лойиҳаларини ишлаб чиқади ҳамда белгиланган тартибда Ўзбекистон Республикаси Вазирлар Маҳкамасига тасдиқлаш учун киритади;

фазовий маълумотлар миллий инфратузилмасини яратиш, унинг амал қилиши ва уни ривожлантириш масалалари бўйича фаолиятни мувофиқлаштиради, Фазовий маълумотлар миллий инфратузилмаси бўйича мувофиқлаштирувчи кенгаш фаолиятини таъминлайди;

фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги давлат мақсадли дастурларининг бажарилишини таъминлайди;

фазовий маълумотлар миллий инфратузилмаси яратилишини, унинг амал қилинишини ва уни ривожлантирилишини таъминлайди;

фазовий маълумотлар миллий инфратузилмасининг базавий фазовий маълумотларини сақловчиси функциясини амалга оширади, давлат органларини, юридик ва жисмоний шахсларни базавий фазовий маълумотлар билан таъминлайди;

администраторни белгилайди, унинг базавий фазовий маълумотларни ишлаб чиқиш, фазовий маълумотлар миллий инфратузилмаси геопорталини яратиш ва сақлаш бўйича фаолиятини таъминлайди;

илмий-тадқиқот, тажриба-конструкторлик ва тажриба-технологик ишларни бажаради, фазовий маълумотлар миллий инфратузилмасининг техник ва дастурий воситалари яратилишини таъминлайди;

фазовий маълумотлар миллий инфратузилмаси, фазовий маълумотларни ишлаб чиқиш, янгилаш, сақлаш, тақдим этиш ва улардан фойдаланиш масалалари бўйича норматив-ҳуқуқий ҳужжатлар лойиҳаларини белгиланган тартибда ишлаб чиқади ва тасдиқлайди;

фазовий маълумотларни ишлаб чиқиш, янгилаш, ишлов бериш, сақлаш, тақдим этиш ва улардан фойдаланиш устидан назоратни амалга оширади;

фазовий маълумотлар миллий инфратузилмаси масалалари бўйича нарх сиёсатини олиб боришни таъминлайди;

фазовий маълумотлар миллий инфратузилмасини жорий этиш ва ундан фойдаланиш мониторингини амалга оширади, йиллик ҳисоботларнинг тайёрланиши ва Ўзбекистон Республикаси Вазирлар Маҳкамасига тақдим этилишини таъминлайди;

Интернет жаҳон ахборот тармоғида фазовий маълумотлар миллий инфратузилмаси геопорталининг ҳукумат портали билан мослигини таъминлайди;

фазовий маълумотлар миллий инфратузилмаси таркибида фазовий маълумотлар ва метамаълумотларнинг ишончилиги ва долзарблигининг доимий мониторингини олиб бориш тартибини белгилайди;

Ўзбекистон Республикасининг халқаро шартномаларига мувофиқ фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасида халқаро ҳамкорликни амалга оширади.

Махсус ваколатли орган қонун ҳужжатларига мувофиқ бошқа ваколатларни ҳам амалга ошириши мумкин.

16-модда. Ўзбекистон Республикаси Мудофаа вазирлигининг фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги ваколатлари

Ўзбекистон Республикаси Мудофаа вазирлиги:

фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасида ягона давлат сиёсатини шакллантириш ва амалга оширишда иштирок этади;

фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги давлат мақсадли дастурларини ишлаб чиқиш ва бажаришда иштирок этади;

давлат миллий хавфсизлиги ва мудофаасини таъминлаш мақсадида махсус ваколатли орган ҳамда Ўзбекистон Республикаси Қуролли Кучлари бошқа органлари билан биргаликда базавий фазовий маълумотлар ишлаб

чиқилишини ҳамда фазовий маълумотлар миллий инфратузилмаси воситаларини яратишни қонунчиликка мувофиқ ташкиллаштиради;

Ўзбекистон Республикасида ҳарбий ҳолат жорий этилган пайтдан бошлаб Ўзбекистон Республикаси ҳудудига нисбатан жисмоний ва юридик шахслар ҳисобидан яратилган ва улар очик бўлганда мудофаа ва давлат хавфсизлигига зарар етказилиши мумкин бўлган фазовий маълумотларни беғараз олиб қўяди.

Ўзбекистон Республикаси Мудофаа вазирлиги қонун ҳужжатларига мувофиқ бошқа ваколатларни ҳам амалга ошириши мумкин.

17-модда. Давлат органларининг фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги ваколатлари

Давлат органлари:

фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасида ягона давлат сиёсатини шакллантириш ва амалга ошириш бўйича таклифларни ишлаб чиқади ва киритади, уларнинг амалга оширилишини таъминлайди;

фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги давлат мақсадли дастурларини ишлаб чиқиш ва амалга оширишда иштирок этади;

фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасида тегишли тармоқ, минтақавий ва маҳаллий дастурларни ишлаб чиқади ва амалга оширади;

махсус ваколатли орган билан биргаликда тегишли тармоқ учун ихтисослашган фазовий маълумотларни ишлаб чиқишни ташкил қилади;

долзарб базавий фазовий маълумотлар ва метамаълумотлар администраторга тақдим этилишини таъминлайди;

фазовий маълумотлар миллий инфратузилмасини юритиш тартибида белгилангандек очик ихтисослаштирилган фазовий маълумотларнинг оммавийлигини таъминлайди;

фазовий маълумотлар миллий инфратузилмаси учун тегишли тармоқ ёки ҳудудга хос ихтисослашган фазовий маълумотлар сақловчиси функциясини амалга оширади;

махсус ваколатли орган билан биргаликда тармоққа оид геоахборот ресурсларини ишлаб чиқиш, геопорталларни яратиш ва қўллаб туриш бўйича ишларни ташкил қилади.

Давлат органлари қонун ҳужжатларига мувофиқ бошқа ваколатларни ҳам амалга ошириши мумкин.

3-боб. Фазовий маълумотлар миллий инфратузилмасини яратиш, унинг амал қилиши ва уни ривожлантириш

18-модда. Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги ишлар турлари

Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги ишлар қуйидагиларни ўз ичига олади:

фазовий маълумотлар ва метамаълумотларни ишлаб чиқиш, янгилаш, ишлов бериш, сақлаш ва тақдим этиш;

турли мақсадлардаги геоахборот сервислари ва геоахборот тизимларини ишлаб чиқиш ва тақдим этиш;

техник ва дастурий воситаларни яратиш;

геопорталларни яратиш ва қўллаб-қувватлаш;

фазовий маълумотлар ва метамаълумотлар сифатини илмий-техник экспертизасидан ўтказиш;

фазовий маълумотлар базаларини, метамаълумотлар базалари ва каталогларини, фазовий маълумотлар сервисларини, геоахборот тизимларини, геопорталларни, фазовий маълумотлар миллий инфратузилмасининг бошқа техник ва дастурий воситаларини яратиш бўйича илмий-тадқиқот, тажриба-технологик ва тажриба-конструкторлик ишларини бажариш;

фазовий маълумотлар миллий инфратузилмаси, фазовий маълумотларни, фазовий маълумотлар сервисларини ва метамаълумотларни ишлаб чиқиш, янгилаш, ишлов бериш, сақлаш, интеграция қилиш ва фойдаланишга оид техник жиҳатдан тартибга солиш соҳасидаги норматив ҳужжатларни ишлаб чиқиш;

фазовий маълумотлар миллий инфратузилмасининг амал қилиши ва уни ривожлантиришни таъминлаш мақсадида бошқа маҳсулотларни яратиш ва (ёки) ишларни бажариш.

19-модда. Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги фаолиятни мувофиқлаштириш

Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги фаолиятни мувофиқлаштириш мақсадида махсус ваколатли орган ҳузурида Фазовий маълумотлар миллий инфратузилмаси бўйича мувофиқлаштирувчи кенгаш (бундан буён матнда Мувофиқлаштирувчи кенгаш деб аталади) ташкил этилади.

Мувофиқлаштирувчи кенгаш юридик шахс мақомига эга бўлмаган коллегиял органдир.

Мувофиқлаштирувчи кенгаш фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасида консултантив-маслаҳат кенгаши функциясини амалга оширади.

Мувофиқлаштирувчи кенгаш давлат органлари, илмий-тадқиқот муассасалари, олий таълим ташкилотлари ҳамда жамоат ташкилотлари вакилларида ташкил топади.

Мувофиқлаштирувчи кенгашни ташкил қилиш, мазкур кенгаш тўғрисидаги низом ва унинг таркиби Ўзбекистон Республикаси Вазирлар Маҳкамаси томонидан тасдиқланади.

20-модда. Фазовий маълумотлар миллий инфратузилмасининг базавий, ихтисослашган фазовий маълумотлари ва метамаълумотлари

Фазовий маълумотлар базавий ва ихтисослашган маълумотларга ажратилади.

Базавий фазовий маълумотлар банки базавий фазовий маълумотлар тўпламлари, уларнинг метамаълумотлари, классификаторлари, ахборотномалари ва реестрлари, шу жумладан, Географик объектлар номлари давлат реестри ва Манзиллар реестридан иборат.

Базавий фазовий маълумотлар қуйидаги геофазовий объектлар ҳақидаги маълумотларни ўз ичига олади:

фазовий маълумотларнинг координата-фазовий асоси ҳақида;

Ўзбекистон Республикаси Давлат чегараси, маъмурий-ҳудудий ва ҳудудий бирликлар чегаралари ҳақида;

гидрографик объектлар ва гидротехник иншоотлар ҳақида;

аҳоли пунктлари ва уларнинг кўча-йўл тармоғи ҳақида;

саноат, қишлоқ хўжалиги объектлари ва ижтимоий-маданий объектлар ҳақида;

бинолар ва иншоотлар ҳақида;

автомобиль йўллари ҳақида;

темир йўллар ҳақида;

магистрал қувурлар ҳақида;

муҳандислик коммуникациялари ҳақида;

аэропортлар, дарё бандаргоҳлари ҳақида;

ўсимлик қопламаси ва тупроқ ҳақида;

ер участкалари чегаралари ҳақида;

муҳофаза этиладиган табиий ҳудудлар ва маданий мерос объектлари ҳақида;

аҳоли пунктларининг режалаштириш элементлари чегаралари ва зоналаштириш объектлари, шунингдек, шаҳар атрофидаги зоналари ҳақида;

муҳофаза зоналари ва алоҳида шартлар асосида ҳудудлардан фойдаланиш зоналари ҳақида;

аҳоли пунктлари ҳудудида ва улардан ташқаридаги жойлашган объектлар манзиллари ва кўчалар реестрлари ҳақида;

географик объектлар номлари ҳақида;

рельефнинг рақамли модели ҳақида;

ортофотокарталар, аэро- ва космик суратлар ва ерни масофадан зондлаш ишлари натижалари ҳақида.

Базавий фазовий маълумотларда давлат сирини ташкил этадиган, шунингдек, қонун ҳужжатларига кўра фойдаланилиши чекланган бошқа ахборот бўлмаслиги керак.

Базавий фазовий маълумотларга, уларнинг таркиби ва мазмунига, метамаълумотларга талаблар Ўзбекистон Республикасининг давлат стандартлари билан белгиланади.

Базавий фазовий маълумотлар банкидаги маълумотлар билан бошқа манбалардаги фазовий маълумотлар ўртасида қарама-қаршиликлар бўлса, базавий фазовий маълумотлар банкидаги маълумотлар ҳақиқий ҳисобланади.

Базавий фазовий маълумотлардан фойдаланиб олинган ва Фазовий маълумотлар миллий инфратузилмасини юритиш тартиби талабларига мос келадиган фазовий маълумотлар ихтисослашган фазовий маълумотларни ташкил қилади. Ихтисослашган фазовий маълумотлар ҳақидаги метамаълумотлар Фазовий маълумотлар миллий инфратузилмасига киритилган бўлиши керак.

Метамаълумотлар ва метамаълумотлар базаларида фазовий маълумотларнинг таркиби, тузилмаси, сифати, ишончилиги, ҳудудий қамрови, функциялари ва улардан фойдаланиш шартлари ҳамда фазовий маълумотлар сервислари ҳақида, шунингдек, фазовий маълумотлар тўпламлари ва сервисларидан фойдаланишдаги чекловлар шартлари, фазовий маълумотларнинг ишлаб чиқувчиси, яратилган вақти, янгиланиш даврийлиги ҳақида маълумотнома ахбороти бўлади, уларда бошқача маълумотнома ахбороти ҳам бўлиши мумкин.

Администратор ҳамда фазовий маълумотлар ишлаб чиқувчилари метамаълумотларни Фазовий маълумотлар миллий инфратузилмасини юритиш тартибига мувофиқ фазовий маълумотларнинг тўпламлари ва сервислари бўйича яратишлари ва янгилашлари шарт.

Давлат органларининг буюртмаси бўйича яратилган фазовий маълумотлар давлат мулки ҳисобланади ҳамда Фазовий маълумотлар миллий инфратузилмасининг таркибий қисмини ташкил этади.

Бошқа шахслар буюртмаси бўйича яратилган фазовий маълумотларга мулк ҳукуқи, қонун ҳужжатларида ёки фазовий маълумотларни яратиш ҳақидаги шартномаларда бошқача тартиб белгиланган бўлмаса, ушбу буюртмачиларга тегишлидир.

Фазовий маълумотлар миллий инфратузилмасидаги фазовий маълумотлар Ўзбекистон Республикаси Вазирлар Маҳкамаси томонидан белгиланган тартибда яратилади, янгиланади, ишлов берилади, сақланади ва координаталар тизимида тақдим этилади.

21-модда. Фазовий маълумотлар миллий инфратузилмасини юритиш тартиби

Фазовий маълумотлар миллий инфратузилмасини юритиш тартиби Ўзбекистон Республикаси Вазирлар Маҳкамаси томонидан белгиланади ҳамда у қуйидагиларни ўз ичига олади:

фазовий маълумотлар миллий инфратузилмасининг фазовий маълумотлари ва метамаълумотларини яратиш, ишлов бериш, сақлаш, тақдим этиш ва улардан фойдаланиш тартиби;

фазовий маълумотлар сақловчилари, ишлаб чиқувчилари, фойдаланувчилари ҳамда администраторнинг ўзаро муносабати тартиби;

администраторнинг фаолият юритиши тартиби;

ишлаб чиқилиши ва тақдим этилиши ташкил этиладиган фазовий маълумотлар ишлаб чиқувчилари ва сақловчилари томонидан яратилган базавий ва ихтисослашган фазовий маълумотлар турлари;

фазовий маълумотлар сақловчилари томонидан фойдаланилиши таъминладиган базавий ва ихтисослашган фазовий маълумотлар турлари;

фазовий маълумотлар миллий инфратузилмасининг фазовий маълумотлари, метамаълумотлари, техник ва дастурий воситалари интероперабеллигига қўйиладиган талаблар;

фазовий маълумотлар миллий инфратузилмасини жорий этиш ва ундан фойдаланиш бўйича ишлар ҳолати ҳақида йиллик ҳисоботнинг тузилмаси, мазмуни, тайёрлаш тартиби ва тақдим этиш муддатлари.

22-модда. Фазовий маълумотлар ва метамаълумотларни тақдим этиш

Администратор фазовий маълумотлардан, метамаълумотлардан ва фазовий маълумотлар сервисларидан фойдаланувчиларнинг фойдаланишларини ҳамда фазовий маълумотлар сақловчилар манфаатларини ҳимоя қилишни ташкил этади.

Фазовий маълумотлар ва метамаълумотлар давлат органларига – ўз ваколатларини амалга ошириш учун бепул асосда, бошқа фойдаланувчиларга эса – Ўзбекистон Республикаси Молия вазирлиги билан келишилган ҳолда махсус ваколатли орган томонидан белгиланган миқдорда ҳақ эвазига тақдим этилади.

Фазовий маълумотлар сақловчилари фазовий маълумотлар миллий инфратузилмасини юритиш тартибига мувофиқ фазовий маълумотлар ва метамаълумотлардан фойдаланишни чеклаб қўйишлари мумкин.

Фазовий маълумотлар миллий инфратузилмаси таркибида қуйидаги фазовий маълумотлар сервисларига эга бўлган геопорталлар тармоғи яратилади ва администратор томонидан хизмат кўрсатилади:

фазовий маълумотлар ва фазовий маълумотлар сервисларини ахборот тармоқларида топишни таъминлайдиган излаш сервислари;

фазовий маълумотларни, геофазовий объектлар тавсифлари ва метамаълумотлар мазмуни ҳақидаги ахборотни кўриб чиқиш сервислари;

фазовий маълумотларни бевосита олишни ёки уларнинг нусхаларини олишни таъминлайдиган сервислар;

фазовий маълумотлар координаталарини трансформациялаш ёки битта координаталар тизимидан ёки картографик проекциядан бошқасига айлантиришни таъминлайдиган координата операциялари сервислари.

Фазовий маълумотлар миллий инфратузилмаси геопорталида фазовий маълумотлар сақловчилари томонидан мазкур Қонунга мувофиқ тақдим этилган базавий фазовий маълумотлар ва метамаълумотлар жойлаштирилади.

Базавий фазовий маълумотлар фойдаланувчиларга фазовий маълумотлар миллий инфратузилмасининг геопортал сервисларидан, “Электрон ҳукумат” тизимининг идоралараро интеграциялашган платформасидан фойдаланган ҳолда ёхуд базавий фазовий маълумотларни Фазовий маълумотлар миллий инфратузилмасини юритиш тартибига мувофиқ ва администратор билан келишган ҳолда белгиланган тартибда бериш йўли билан тақдим этилиши мумкин.

Базавий фазовий маълумотлар ишлаб чиқувчилари базавий фазовий маълумотларни администраторга тақдим этишлари шарт.

Базавий фазовий маълумотларнинг администраторга тақдим этилиши базавий фазовий маълумотлар ишлаб чиқувчилари томонидан:

геосервисларга киришга рухсат бериш;

фазовий маълумотларни келишилган шакл ва сифатда узатиш йўли билан амалга оширилади.

Администратор фазовий маълумотлар миллий инфратузилмасини юритиш тартибига мувофиқ қуйидагиларни амалга оширади:

фазовий маълумотлар метамаълумотларини қабул қилиш ва назорат қилиш ҳамда уларни Фазовий маълумотлар миллий инфратузилмаси геопорталига жойлаштириш;

геоахборот тизимларида, ресурсларида ва маълумотлар базаларида мавжуд бўлган ва давлат хизматларини кўрсатиш учун керак бўлган ахборот ва маълумотларни “Электрон ҳукумат” тизимининг идоралараро интеграциялашган платформасига тақдим этиш;

базавий фазовий маълумотларни қабул қилиш ва назорат қилиш ҳамда уларни Фазовий маълумотлар миллий инфратузилмаси геопорталига жойлаштириш;

Фазовий маълумотлар миллий инфратузилмасининг амал қилиши ва ривожлантирилиши учун дастурий таъминотни яратиш ва уни иш жараёнида кузатиб бориш;

Фазовий маълумотлар миллий инфратузилмасининг техник ва технологик таъминотини таъминлаш;

Фазовий маълумотлар миллий инфратузилмаси маълумотларини сақлаш ва ҳимоя қилиш;

фазовий маълумотлар сервисларини яратиш ва уларга хизмат кўрсатишни таъминлаш;

Фазовий маълумотлар миллий инфратузилмаси геопорталига жойлаштирилган фазовий маълумотлар ва метамаълумотлардан фойдаланувчилар фойдаланишини таъминлаш.

Администратор фазовий маълумотлар сақловчисининг розилиги билан:

қоғоз ташувчилардаги фазовий маълумотларни электрон шаклга айлантиради;

фазовий маълумотларни ва метамаълумотларни яратади;

ихтисослашган фазовий маълумотлар ва метамаълумотларга ишлов беради ва янгилайди;

Фазовий маълумотлар миллий инфратузилмаси таркибидаги базавий фазовий маълумотлар ва метамаълумотларни фазовий маълумотлар миллий инфратузилмасини юритиш тартибига мувофиқ фойдаланувчиларга тақдим этади.

Фазовий маълумотлар сақловчиси:

фазовий маълумотлар ва метамаълумотларни яратишга буюртма беради;

фазовий маълумотлар ва метамаълумотларнинг янгиланиши ва юритилишини таъминлайди;

Фазовий маълумотлар миллий инфратузилмаси таркибидаги фазовий маълумотлар ва метамаълумотлардан ўз ваколатларини амалга оширишда фойдаланади;

фазовий маълумотлар ва метамаълумотларнинг долзарблиги, тўлиқлиги, аниқлиги, ишончлилиги, яхлитлиги, асосланганлиги ва расмийлигини таъминлайди;

фазовий маълумотлар ва метамаълумотлар администраторга тақдим этилишини таъминлайди;

администраторга ўз фазовий маълумотлари ва метамаълумотларидан фойдаланиш имкониятини таъминлайди;

фазовий маълумотлар миллий инфратузилмаси геопортали орқали фазовий маълумотлардан фойдаланилиши ҳақидаги ахборотни ўз веб-сайтида жойлаштиради.

23-модда. Фазовий маълумотлар миллий инфратузилмасини яратиш, унинг амал қилиши ва уни ривожлантириш бўйича ишларни молиялаштириш

Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги ишларни молиялаштириш Ўзбекистон Республикаси Давлат бюджети ҳисобига махсус ваколатли органга ҳар йили ажратиладиган маблағлар доирасида, буюртмачилар – давлат органлари, юридик ва жисмоний шахслар маблағлари ҳамда қонунда тақиқланмаган бошқа манбалар ҳисобига амалга оширилади.

4-боб. Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасида назорат, Фазовий маълумотлар миллий инфратузилмаси тўғрисидаги қонун ҳужжатларини бузганлик учун жавобгарлик ва низоларни ҳал қилиш тартиби

24-модда. Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасида назоратни амалга ошириш

Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасида назоратни махсус ваколатли орган амалга оширади.

Администратор Фазовий маълумотлар миллий инфратузилмасини юритиш тартибига мувофиқ тақдим этилган Фазовий маълумотлар миллий инфратузилмаси таркибидаги фазовий маълумотлар ва метамаълумотларнинг ишончлилиги ва долзарблигининг доимий мониторингини юритади.

Белгиланган тартибни бузган ҳолда тақдим этилган ишончсиз ва долзарб бўлмаган фазовий маълумотларни аниқлаш натижаларига кўра администратор ушбу маълумотларни олишни блоклаб қўяди.

Фазовий маълумотлар миллий инфратузилмаси таркибидаги фазовий маълумотлар ва метамаълумотларни ишлаб чиқиш, янгилаш, ишлов бериш, сақлаш, тақдим этиш ва фойдаланишнинг белгиланган тартиби бузилганлиги аниқланганда махсус ваколатли орган Фазовий маълумотлар миллий инфратузилмаси тўғрисидаги қонун ҳужжатларининг бузилишида айбдор мансабдор шахсларни белгиланган тартибда жавобгарликка тортиш ҳақида асосланган қарор қабул қилади.

25-модда. Фазовий маълумотлар миллий инфратузилмаси тўғрисидаги қонун ҳужжатларини бузганлик учун жавобгарлик

Фазовий маълумотлар миллий инфратузилмаси тўғрисидаги қонун ҳужжатларини бузганликда айбдор шахслар белгиланган тартибда жавобгар

бўлади.

Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги қуйидаги ҳуқуқбузарликлар учун жавобгарлик айбдор мансабдор шахсларга юкланади:

фазовий маълумотлар ва метамаълумотларни ишлаб чиқиш, янгилаш, ишлов бериш, сақлаш, тақдим этиш ва фойдаланишда белгиланган меъёрлар ва қоидаларнинг бузилиши;

администраторга базавий фазовий маълумотлар ва метамаълумотларни тақдим этиш шартларининг бузилиши.

26-модда. Низоларни ҳал этиш

Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги низолар қонун ҳужжатларида белгиланган тартибда ҳал этилади.

27-модда. Фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги фаолият натижасида етказилган зарарни қоплаш

Юридик ёки жисмоний шахснинг мол-мулкига фазовий маълумотлар миллий инфратузилмасини яратиш, унинг амал қилиши ва уни ривожлантириш соҳасидаги фаолият натижасида етказилган зарар қонун ҳужжатларида белгиланган тартибда қопланиши лозим.

5-боб. Якунловчи қоидалар

28-модда. Ушбу Қонуннинг ижросини, ижрочиларга етказилишини, моҳияти ва аҳамияти тушунтирилишини таъминлаш

Ўзбекистон Республикаси Ер ресурслари, геодезия, картография ва давлат кадастри давлат қўмитаси ушбу Қонуннинг ижросини, ижрочиларга етказилишини, моҳияти ва аҳамияти аҳоли ўртасида тушунтирилишини таъминласин.

29-модда. Қонун ҳужжатларини ушбу Қонунга мувофиқлаштириш

Ўзбекистон Республикаси Вазирлар Маҳкамаси:

ҳукумат қарорларини мазкур Қонунга мувофиқлаштиради;

давлат бошқаруви органлари ушбу Қонунга зид бўлган ўз норматив-ҳуқуқий ҳужжатларини қайта кўриб чиқишлари ва бекор қилишларини таъминласин.

30-модда. Ушбу Қонуннинг кучга кириши

Ушбу Қонун расмий эълон қилинган кундан эътиборан уч ой ўтгач кучга кириди.

**Ўзбекистон Республикаси
Президенти**

Ш. Мирзиёев